



**POSLOVNIK
O RADU VIJEĆA DOKTORSKOG STUDIJA**

Travnik, decembar 2014. godine

Na osnovu člana 10. Pravila studiranja za treći ciklus studija Univerziteta u Travnik, Vijeće doktorskog studija Univerziteta u Travnika na sjednici održanoj dana 24.12.2014. godine donosi

POSLOVNIK O RADU VIJEĆA DOKTORSKOG STUDIJA

I OPŠTE ODREDBE

Član 1.

Poslovníkom o radu Vijeća doktorskog studija uređuje se način rada, odlučivanje, tok rada, način vođenja sjednice i zapisnika na sjednicama.

Član 2.

Sjednicama Vijeća doktorskog studija Univerziteta (u daljem tekstu: Vijeće Univerziteta) i Vijeća doktorskog studija organizatora/nositelja (u daljem tekstu: Vijeće organizatora/nositelja) predsjedava predsjednik Vijeća Univerziteta, odnosno, predsjednik Vijeća organizatora/nositelja (u daljem tekstu: predsjednik).

Sekretar Vijeća Univerziteta i sekretar Vijeća organizatora/nositelja, koga imenuje Vijeće Univerziteta, odnosno Vijeće organizatora/nositelja, pomaže predsjedniku u sazivanju i radu Vijeća.

Član 3.

Vijeće Univerziteta raspravlja i rješava sva pitanja koja se odnose na organizaciju i realizaciju nastavno-naučnog procesa na trećem ciklusu studija.

Vijeće organizatora/nositelja razmatra i daje prijedloge Senatu Univerziteta po pitanju prijave i odbrane doktorskih disertacija, u smislu formiranja komisija za ocjenu podobnosti kandidata i teme, kao i komisija za ocjenu i odbranu doktorske disertacije.

Član 4.

Odredbe Poslovnika dužni su da poštuju svi članovi Vijeća, kao i ostala lica koja prisustvuju sjednicama.

Član 5.

O primjeni Poslovnika brine se predsjednik.

II ČLANOVI VIJEĆA

Član 6.

Vijeće organizatora/nositelja sačinjavaju svi nosioci nastavnog i istraživačkog procesa trećeg ciklusa, uključujući i prodekana za nastavu i prodekana za naučnoistraživački rad. Radom Vijeća organizatora/nositelja rukovodi predsjednik kojeg imenuju članovi Vijeća organizatora/nositelja na mandat od 4 godine.

Vijeće Univerziteta čine svi predsjednici Vijeća organizatora/nositelja studija, a radom Vijeća Univerziteta rukovodi predsjednik, kojeg imenuju članovi Vijeća.

Član 7.

Članovi Vijeća Univerziteta i Vijeća organizatora/nositelja imaju pravo i obavezu učestvovati u radu i odlučivanju Vijeća, i to:

- imaju pravo i obavezu prisustvovati sjednicama Vijeća;
- imaju pravo pokretati rasprave o pitanjima iz djelokruga Vijeća te predlagati rješenja, zaključke, odluke;
- dužni su preuzeti obaveze, izvršavati zadatke i učestvovati u aktivnostima Vijeća i njenih komisija;
- imaju pravo da budu redovno i povremeno obavješteni o svim pitanjima i problemima iz djelokruga Vijeća;
- imaju pravo da analiziraju i prate realizaciju doktorskih studija.

Član 8.

Vijeće organizatora/nositelja obavlja sljedeće poslove:

- predlaže strateški plan razvoja dokorskog studija;
- razmatra nastavni plan i program dokorskog studija;
- razmatra prijave tema dokorskih disertacija;
- razmatra i druge zahtjeve doktoranata;
- obrazuje komisije za ocjene podobnosti kandidata i teme dokorske disertacije;
- predlaže Senatu komisiju za ocjenu i odbranu dokorske disertacije;
- razmatra izvještaj o realizaciji dokorskog studija i predlaže mjere za unapređenje studija;
- razmatra i predlaže Senatu Univerziteta mjere za unapređenje dokorskog studija.

Vijeće Univerziteta obavlja sljedeće poslove:

- koordinira i prati realizaciju svih studijskih programa na Univerzitetu;
- koordinira poslove interdisciplinarnih studija;
- određuje precizne kriterije za upis studenata sa nematičnih studijskih programa;
- utvrđuje kriterije za upis na multidisciplinarne studije;
- prati dosljednu primjenu Pravila studiranja za III ciklus studija,
- podnosi izvještaj Senatu Univerziteta o toku dokorskog studija najmanje jednom u toku šest mjeseci, a po potrebi i češće;
- predlaže izmjene i dopune Pravila studiranja za III ciklus studija i provedbenih akata;
- donosi poslovnik o radu Vijeća dokorskog studija;
- obavlja i druge poslove u vezi sa organizacijom dokorskog studija, a koji nisu u nadležnosti Vijeća dokorskog studija organizatora/nositelja.

III SJEDNICE VIJEĆA UNIVERZITETA I VIJEĆA ORGANIZATORA/NOSITELJA

III 1. Sazivanje

Član 9.

Sjednice Vijeća Univerziteta i Vijeća organizatora/nositelja (u daljem tekstu: Vijeća) saziva i njima presjedava predsjednik, a u slučaju njegove odsutnosti član Vijeća koga ovlasti predsjednik. Sjednice Vijeća se sazivaju u pismenom ili u elektronskom obliku - putem e-maila.

Član 10.

Predsjednik saziva sjednicu:

- po potrebi Vijeća;
- na zahtjev Rektora Univerziteta.

III 2. Poziv i materijal

Član 11.

Poziv kao i pisani materijal za sjednicu Vijeća, dostavlja se najmanje 7 dana prije sjednice u pisanom ili u elektronskom obliku - putem e-maila. Materijal za sjednicu, u izuzetnim slučajevima, može biti predan na samoj sjednici, o čemu će članovi Vijeća biti prethodno obavješteni.

Član 12.

Član Vijeća dužan je da prisustvuje sjednici, a u slučaju spriječenosti, o tome obavještava Predsjednika.

III 3. Tok održavanja sjednice i rasprava

Član 13.

Vrijeme održavanja sjednice i dnevni red predlaže Predsjednik, odnosno, u slučaju odsutnosti, ovlaštenu član Vijeća. Dnevni red se usvaja na početku sjednice većinom glasova prisutnih članova Vijeća.

Član 14.

Vijeće može da zasjeda, ako je na sjednici prisutna nadpolovična većina članova.

Član 15.

Sjednici Vijeća mogu prisustvovati i druga lica koja svojim radom mogu doprinjeti kvalitetu rada Vijeća, ali bez prava odlučivanja.

Član 16.

Nakon usvajanja dnevnog reda sjednice Vijeća i verifikacije zapisnika sa prethodne sjednice, prelazi se na raspravu o pojedinim tačkama po redosljedu predviđenim dnevnim redom. O svakoj tački dnevnog reda, prije glasanja, otvara se rasprava koja traje sve dok ima prijavljenih govornika, nakon čega Predsjednik raspravu zaključuje i daje na glasanje.

Član 17.

Prijava za riječ podnosi se podizanjem ruke, sve do zaključka rasprave. Predsjednik daje riječ redosljedom prijave za riječ.

Učesnik u raspravi dužan je da govori samo o pitanju predmeta rasprave, kratko i vodeći se načelima pristojnosti.

Ako se učesnik rasprave udalji od predmeta rasprave, Predsjednik je dužan da ga opomene, a u slučaju da se isto ponovi, može se oduzeti riječ.

Član 18.

U slučaju povrede reda na sjednici Vijeća, Predsjednik može dati opomenu i oduzeti riječ svakome ko se ne pridržava reda. Opomena se izriče licu koje svojim ponašanjem ili govorom narušava red i koje se ne pridržava dnevnog reda ili odredaba Poslovnika o radu Vijeća.

Član 19.

U toku rasprave po određenim pitanjima, Predsjednik može dati riječ drugom licu koje nije član, kada je potrebno stručno ili drugo obrazloženje, po određenim pitanjima.

III 4. Glasanje

Član 20.

Nakon zaključene rasprave, Predsjednik poziva prisutne članove Vijeća na glasanje o prijedlogu odluke ili zaključku. Ako su na prijedloge stavljene primjedbe, najprije se glasa o njima, a nakon toga o prijedlogu kao cjelini. Za usvajanje odluke ili zaključka potrebna je prosta većina glasova prisutnih članova Vijeća.

Član 21.

Glasanje na sjednicama Vijeća je javno, izuzev kada Vijeće prostom većinom glasova prisutnih članova, odluči da je glasanje o pojedinim tačkama dnevnog reda tajno.

Član 22.

Usvojene odluke i zaključci koje čine sastavni dio zapisnika sjednice Vijeća, dostavljaju se licima koja su dužna da ih sprovedu u roku od 7 dana, od dana održavanja sjednice.

Član 23.

O radu Vijeća sekretar vodi zapisnik koji se čuva u arhivi. Zapisnik sjednice potpisuju sekretar i Predsjednik Vijeća. Zapisnik sa sjednice Vijeća usvaja se na narednoj sjednici.

IV PRIJELAZNE I ZAVRŠNE ODREDBE

Član 24.

Za tumačenje odredaba ovog Poslovnika nadležno je Vijeće doktorskog studija Univerziteta.

Član 25.

Izmjene i dopune Poslovnika donosi Vijeće doktorskog studija Univerziteta.

Član 26.

Ovaj Poslovnik stupa na snagu naredni dan od dana usvajanja, a raniji Poslovnik br. 54/11-b od 28.03.2011. godine prestaje da se primjenjuje.

Broj: 04-DS/14

Datum: 24.12.2014. godine

Predsjednik Vijeća
doktorskog studija Univerziteta
prof. dr. Zijad Hasić, s. r.